

水經注

四冊

ル 5

114

4



目  
114  
4



水經注卷六

後魏酈道元撰

所錢  
有物

汾水 澮水 文水

原公水 洞過水 晉水 湛水

汾水出太原汾陽縣北管涔山

山海經曰北次二經之首在河之東其首枕汾案近刻其

下衍東字汾字曰管涔之山其上無木而下多玉案  
海經作其上無木而多草其下多玉案西近刻  
託作而

十三州志曰出武州之燕京山亦管涔之異名也其

水經注 卷六 汾水

山重阜脩巖有草無木泉源導于南麓之下蓋稚水  
 濛流耳又西南夾岸連山聯峯接勢劉淵族子曜嘗  
 隱避于管涔之山案避近刻作居夜中忽有二童子入跪曰  
 管涔王使小臣奉謁趙皇帝獻劔一口置前再拜而  
 去以燭視之劔長二尺光澤非常背有銘曰神劔御  
案御上近刻有服字除眾毒曜遂服之劔隨時變為五色也後  
 曜遂為胡王矣汾水又南與東西溫溪合水出左右  
 近溪案近刻脫左字聲流翼注水上雜樹交蔭雲垂煙接自  
 是水流潭漲波襄轉泛又南逕一城東憑墉積石側

枕汾水俗謂之代城

案此下近刻重一城字

又南出二城閒其

城角倚翼枕汾流世謂之侯莫干城蓋語出戎方傳

呼失實也汾水又南逕汾陽縣故城東川土寬平垣

山夷水地理志曰

案近刻作故地理志衍故字脫曰字

汾水出汾陽縣

北山西南流者也漢高帝十一年封斬彊為侯國後

立屯農積粟在斯謂之羊腸倉山有羊腸坂在晉陽

西北石墜縈行

案近刻作縈委

若羊腸焉故倉坂取名矣漢

永平中治呼沱石曰河按司馬彪後漢郡國志常山

南行唐縣有石曰谷

案此十九字亦注內之小注

蓋資承呼沱之

水轉山東之漕

案近刻資承訛作  
谷乘漕訛作費

自都慮至羊腸倉

案慮近刻  
訛作盧

將憑汾水以漕太原用實秦晉苦役連年

轉運所經凡三百八十九隘

案三近刻  
訛作二

死者無算拜

鄧訓為謁者監護水功訓隱括知其難立具言肅宗

肅宗從之全活數千人和熹鄧后之立

案熹近刻  
訛作熹叔

父陔以為訓積善所致也

案原本及近刻並脫  
陔字今據後漢書補羊腸

即此倉也又南逕秀容城東

案近刻脫  
此七字

魏土地記曰

秀容胡人徙居之立秀容護軍治東去汾水六十里

案汾近刻  
訛作汾

南與酸水合水源西出少陽之山東南流

注于汾水汾水又南出山東南流洛陰水注之水出

新興郡西流逕洛陰城北又西逕孟縣故城南春秋

左傳昭公二十八年分祁氏七縣為大夫之邑以孟

丙為孟大夫洛陰水又西

案近刻脫  
洛陰二字

逕狼孟縣故城

南王莽之狼調也左右夾澗幽深南面大壑俗謂之

狼馬澗舊斷澗為城有南北門門闔故壁尙在洛陰

水又西南逕陽曲城北魏土地記曰陽曲胡寄居太

原界置陽曲護軍治其水西南流注于汾水汾水又

南逕陽曲城西南注也

東南過晉陽縣東晉水從縣南東流注之

案近刻南字  
訛在東字下

太原郡治晉陽城秦莊襄王三年立

案莊近刻  
訛作昭

尚書

所謂既脩太原者也春秋說題辭曰高平曰太原原

端也平而有度廣雅曰大鹵太原也釋名曰地不生

物曰鹵鹵鑪也

案近刻鑪訛作盧  
脫一鹵字及也字

穀梁傳曰中國曰

太原夷狄曰太鹵尚書大傳曰東原底平大而高平

者謂之太原郡取稱焉魏土地記曰城東有汾水南

流水東有晉使持節都督并州諸軍事鎮北將軍太

原成王之碑水上舊有梁青莽殞于梁下

案青莽近  
刻訛作清

并 豫讓死于津側亦襄子解衣之所在也汾水西逕

晉陽城南舊有介子推祠祠前有碑廟宇傾頽惟單

碑獨存矣今文字剝落無可尋也

又南洞過水從東來注之

案過近刻  
作過下同

汾水又南逕梗陽縣故城東故榆次之梗陽鄉也

案鄉

近刻訛  
作縣

魏獻子以邑大夫魏戊也京相璠曰梗陽晉

邑也今太原晉陽縣南六十里榆次界有梗陽城

案近

刻訛  
作地

汾水又南即洞過水會者也

又南過大陵縣東

昔趙武靈王遊大陵夢處女鼓琴而歌想見其人吳  
 廣進孟姚焉即于此縣也王莽改曰大寧矣汾水于  
 縣左池為鄔澤廣雅曰水自汾出為汾陂其陂東西  
 四里南北十餘里陂南接鄔地理志曰九澤在北并  
 州藪也呂氏春秋謂之大陸又名之曰漚洩之澤俗  
 謂之鄔城泊案近刻脫泊字許慎說文曰馮水出西河中陽  
 縣北沙案近刻西南入河即此水也馮水又會嬰侯之  
 水山海經稱謁戾之山嬰侯之水出于其陰北流注  
 于祀水案祀近刻訛作祀水出祀山其水殊源共舍案近刻訛

作其合注于嬰侯之水亂流逕中都縣南俗又謂之中

都水侯甲水注之水發源祁縣胡甲山案近刻源訛作原祁訛作

平有長坂謂之胡甲嶺即劉歆遂初賦所謂越侯甲

而長驅者也蔡邕曰侯甲亦邑名也在祁縣侯甲水

又西北歷宜歲郊逕太谷謂之太谷水出谷西北流

逕祁縣故城南自縣連延西接鄔澤是為祁藪也即

爾雅所謂昭餘祁矣賈辛邑也辛貌醜妻不為言與

之如臯射雉雙中之則笑也案左傳魏子引叔向稱賈大夫事杜預云賈國

之大夫是也此誤以為賈辛王莽之示縣也又西逕京陵縣故城

北王莽更名曰致城矣于春秋為九原之地也故國語曰趙文子與叔向遊于九原曰死者若可作也吾誰與歸叔向曰其陽子乎文子曰夫陽子行并植于晉國不免其身智不足稱叔向曰其舅犯乎文子曰夫舅犯見利不顧其君仁不足稱案近刻脫此二十三字吾其隨會乎納諫不忘其師言身不失其友事君不援而進不阿而退案近刻脫此十六字其故京尚存案故字近刻漢訛在其字上漢興增陵于其下故曰京陵焉侯甲水又西北逕中都縣故城南城臨際水澹案城臨近刻訛作臨城春秋昭公二年

晉侯執陳無宇于中都者也漢文帝為代王都此武帝元封四年上幸中都宮殿上見光赦中都死罪以下侯甲水又西合于嬰侯之水逕鄆縣故城南晉大夫司馬彌牟之邑也謂之鄆水俗亦曰慮水慮鄆聲相近故因變焉又西北入鄆陂而歸于汾流矣又南過平陶縣東文水從西來流注之

汾水又南與石桐水合即綿水也水出界休縣之綿山北流逕石桐寺西即介子推之祠也昔子推逃晉文公之賞而隱于綿上之山也晉文公求之不得乃

封綿爲介子推田曰以志吾過且旌善人因名斯山  
爲介山故袁山松郡國志曰界休縣有介山綿上聚  
子推廟王肅喪服要記曰昔魯哀公祖載其父孔子  
問曰寧設桂樹乎哀公曰不也桂樹者起于介子推  
子推晉之人也文公有內難出國之狄子推隨其行  
割肉以續軍糧後文公復國忽忘子推子推奉唱而  
歌文公始悟當受爵祿子推奔介山抱木而燒死國  
人葬之恐其神魂實于地案賈近刻  
訛作賈故作桂樹焉吾  
父生于宮殿死于枕席何用桂樹爲余按夫子尚非

璠璣送葬安能問桂樹爲禮乎王肅此證近于誣矣

石桐水又西流注于汾水汾水又西南逕界休縣故

城西王莽更名之曰界美矣城東有徵士郭林宗宋

子浚二碑宋沖以有道司徒徵案此句有  
脫誤未詳林宗縣人

也案近刻  
脫人字辟司徒舉太尉以疾辭其碑文云將蹈洪

崖之遐迹紹巢由之逸軌翔區外以舒翼超天衢以

高峙稟命不融享年四十有二案近刻  
作三建寧二年案

刻訛作  
四年正月丁亥卒凡我四方同好之人永懷哀痛

乃樹碑表墓昭銘景行云陳畱蔡伯喈范陽盧子幹



扶風馬日磾等遠來奔喪持朋友服案近刻脫持字心喪朞

年者如韓子助宋子浚等二十四人其餘門人著錫

衰者千數案此下近刻衍其碑文故四字蔡伯喈謂盧子幹馬日磾

曰吾為天下碑文多矣皆有慙容惟郭有道無愧于

色矣汾水之右有左部城側臨汾水蓋劉淵為晉都

尉所築也

又南過冠爵津

汾津名也在界休縣之西南俗謂之雀鼠谷數十里

閒道險隘水左右悉結偏梁閣道纍石就路縈帶巖

側或去水一丈或高五六尺案近刻脫水字上戴山

阜下臨絕澗俗謂之為魯般橋蓋通古之津隘矣亦

在今之地險也

又南入河東界又南過永安縣西

故彘縣也周厲王流于彘即此城也王莽更名黃城

漢順帝陽嘉三年改曰永安縣霍伯之都也

歷唐城東案此四字原本及近刻竝誤入注內接霍伯

正今改

薛瓚注漢書云堯所都也東去彘十里汾水又南案近

刻訛作又東

與琬水合水出東北太岳山禹貢所謂岳陽

也即霍太山矣上有飛廉墓飛廉以善走事紂惡來

多力見知周武王伐紂案近刻脫武字兼殺惡來飛廉先為

紂使北方還無所報乃壇于霍太山而致命焉得石

棺銘曰帝令處父不與殷亂賜汝石棺以葬死遂以

葬焉霍太山有岳廟廟甚靈鳥雀不棲其林猛虎常

守其庭又有靈泉以供祭祀案近刻作事鼓動則泉流聲

絕則水竭湘東陰山縣有侯曇山上有靈壇壇前有

石井深數尺居常無水及臨祈禱則甘泉湧出周用

則已亦其比也彘水又西流逕觀阜北故百邑也原

過之從襄子也受竹書于王澤以告襄子襄子齋三

日親自剖竹有朱書曰余霍太山山陽侯天使也三

月丙戌余將使汝反滅智氏汝亦立我于百邑襄子

拜受三神之命遂滅智氏祠三神于百邑使原過主

之世謂其處為觀阜也彘水又西流逕永安縣故城

南西南流注于汾水汾水又南逕霍城東故霍國也

昔晉獻公滅霍趙夙為御霍公求奔齊案霍公求近刻作霍哀公

下晉國大旱卜之曰霍太山為祟使趙夙召霍君奉

祀晉復穰蓋霍公求之故居也汾水又逕趙城西南  
穆王以封造父趙氏自此始也汾水又南霍水入焉  
水出霍太山發源成潭漲七十步而不測其深西南  
逕趙城南西流注于汾水

又南過楊縣東

澗水東出穀遠縣西山西南逕霍山南又西逕楊縣  
故城北案楊縣二字近刻訛在霍字上晉大夫僚安之邑也案僚安近刻訛  
作僚公應劭曰故楊侯國王莽更名有年亭也其水  
西流入于汾水汾水逕楊城西不于東矣魏土地記

曰平陽郡治楊縣郡西有汾水南流者是也

西南過高梁邑西

黑水出黑山西逕楊城南又西與巢山水會山海經  
曰牛首之山勞水出焉西流注于滴水疑是水也滴  
水即巢山之水也水源東南出巢山東谷北逕浮山  
東又西北流與勞水合亂流西北逕高梁城北西流  
入于汾水汾水又南逕高梁故城西故高梁之墟也  
春秋僖公二十四年秦穆公納公子重耳于晉害懷  
公子此竹書紀年晉出公十三年案近刻訛作三十年智伯瑤

城高粱漢高帝十二年以為侯國封恭侯酈疥于斯

邑也

案疥近刻  
訛作介

又南過平陽縣東

汾水又南逕白馬城西魏刑白馬而築之故世謂之

白馬城今平陽郡治汾水又南逕平陽縣故城東晉

大夫趙鼂之故邑也應劭曰縣在平河之陽堯舜竝

都之也竹書紀年晉烈公元年韓武子都平陽漢昭

帝封度遼將軍范明友為侯國王莽之香平也魏立

平陽郡

案魏近刻  
訛作晉

治此矣水側有堯廟廟前有碑魏

土地記曰平陽城東十里汾水東原上有小臺臺上

有堯神屋石碑永嘉三年劉淵徙平陽于汾水得白

玉印方四寸高二寸二分龍紐其文曰有新寶之印

王莽所造也淵以為天授改永鳳二年為河瑞元年

汾水南與平水合

案平水近刻  
訛作平陽

水出平陽縣西壺口

山

案近刻  
脫縣字

尚書所謂壺口治梁及岐也其水東逕狐

谷亭北春秋時狄侵晉取狐廚者也又東逕平陽城

南東入汾俗以為晉水非也汾水又南歷襄陵縣故

城西晉大夫卻犇之邑也故其地有犇氏鄉亭矣西

北有晉襄公陵案近刻脫此七字縣蓋卽陵以命氏也案命近刻

作名王莽更名曰幹昌矣

又南過臨汾縣東

天井水出東陘山西南北有長嶺嶺上東西有通道

卽鉞墜也穆天子傳曰乙酉天子西絕鉞墜西南至

監是也案監近刻訛作鹽其水三泉奇發西北流總成一川

西逕堯城南又西流入汾案流字近刻訛作南

又屈從縣南西流

汾水又逕絳縣故城北竹書紀年梁武王二十五年

案朱謀埠云當絳中地瀆西絕于汾汾水西逕虓邴作梁惠成王

宮北橫水有故梁截汾水中凡有三十柱柱徑五尺

裁與水平蓋晉平公之故梁也物在水故能持久而

不敗也又西逕魏正平郡南故東雍州治案近刻脫雍字太

和中皇都徙洛罷州立郡矣又西逕王澤案原本訛作王橋近

刻訛作正橋考原過受竹書于王澤卽此地今改正澮水入焉

又西過長脩縣南

汾水又西與古水合水出臨汾縣故城西黃阜下其

大若輪西南流故溝橫出焉案溝橫近刻訛作橫溝東注于汾

今無水又西南逕魏正平郡北又西逕荀城東古荀國也汲郡古文晉武公滅荀以賜大夫原氏也古水又西南入于汾汾水又西南逕長脩縣故城南漢高帝十一年以為侯國封杜恬也案杜近刻訛作莊有脩水出縣南而西南流入汾汾水又西逕清原城北故清陽亭也城北有清原晉侯蒐清原作三軍處也汾水又逕冀亭南昔曰季使過冀野見郤缺耨其妻饁之相敬如賓言之文公文公命之為卿復與之冀京相璠曰今河東皮氏縣有冀亭古之冀國所都也杜預釋

地曰平陽皮氏縣東北有冀亭即此亭也汾水又西與華水合水出北山華谷西南流逕一故城西俗謂之梗陽城非也梗陽在榆次不在此按故漢上谷長史侯相碑云侯氏出自倉頡之後踰殷歷周案歷近刻訛作立各以氏分或著楚魏或顯齊秦晉卿士薦斯其胃也食采華陽今蒲坂北亭即是城也其水西南流注于汾汾水又逕稷山北在水南四十許里山東西二十里南北三十里高十三里西去介山十五里山上有稷祠山下稷亭春秋宣公十五年秦桓公伐晉晉

侯治兵于稷以略狄土案近刻脫伐是也

又西過皮氏縣南

汾水西逕郟丘北案近刻訛故漢氏之方澤也賈

逵云漢法三年祭地汾陰方澤澤中有方丘故謂之

方澤丘即郟丘也許慎說文稱從邑癸聲案近刻訛作登

河東臨汾地名矣在介山北山即汾山也其山特立

周七十里高三十里文穎言在皮氏縣東南則可三

十里案則近刻訛作側乃非也今準此山可高十餘里山上

有神廟廟側有靈泉祈祭之日周而不耗世亦謂之

子推祠揚雄河東賦曰靈輿安步周流容與以覽于

介山嗟文公而愍推兮勤大禹于龍門晉太康記及

地道記與永初記竝言子推所逃隱于是山即實非

也余按介推所隱者綿山也文公環而封之為介推

田號其山為介山杜預曰在西河界休縣者是也汾

水又西逕耿鄉城北故殷都也帝祖乙自相徙此為

河所毀故書敘曰祖乙圮于耿杜預曰平陽皮氏縣

東南耿鄉是也盤庚以耿在河北迫近山川乃自耿

遷亳案此下近刻衍後字晉獻公滅耿案近刻作滅之以封趙夙後襄

子與韓魏分晉韓康子居平陽魏桓子都安邑號爲  
三晉此其一也漢武帝行幸河東濟汾河作秋風辭  
于斯水之上汾水又西逕皮氏縣南竹書紀年魏襄  
王十二年秦公孫爰率師伐我圍皮氏翟章率師救  
皮氏圍疾西風十三年城皮氏者也漢河東太守潘  
係穿渠引汾水以溉皮氏縣故渠尙存今無水也  
又西至汾陰縣北西注于河

水南有長阜背汾帶河阜長四五里廣二里餘高十  
丈汾水歷其陰西入河漢書謂之汾陰雕應劭曰雕  
丘類也汾陰男子公孫祥望氣寶物之精上見祥言  
之于武帝武帝于水獲寶鼎焉遷于甘泉宮改其年  
曰元鼎卽此處

澮水出河東絳縣東澮交東高山

澮水東出絳高山

案絳近刻作詳

亦曰河南山又曰澮山西

逕翼城南按詩譜言晉穆侯遷都于絳暨孫孝侯改  
絳爲翼翼爲晉之舊都也後獻公北廣其城方二里  
又命之爲絳故司馬遷史記年表稱獻公九年始城  
絳都左傳莊公二十六年晉士蔿城絳以深其宮是



也其水又西南合黑水案此下近刻衍嶺字水導源東北黑水

谷西南流逕翼城北右引北川水水出平川南流注

之亂流西南入澮水澮水又西南與諸水合謂之澮

交竹書紀年曰莊伯十二年翼侯焚曲沃之禾而還

作為文公也案此句有訛舛未詳又有賀水東出近川西南至

澮交入澮又有高泉水出東南近川西北趣澮交注

澮又南紫谷水東出白馬山白馬川遁甲開山圖曰

絳山東距白馬山謂是山也西逕熒庭城南案熒近刻訛作

榮而西出紫谷與乾河合即教水之枝川也史記白

起傳稱涉河取韓安邑東至乾河是也其水西與田

川水合水出東溪西北至澮交入澮又有于家水案于

近刻訛出于家谷竹書紀年曰莊伯以曲沃叛伐翼

公子萬救翼荀叔軫追之至于家谷有范壁水出于

壁下竝西北流至翼廣城昔晉軍北入翼廣築之因

即其姓以名之二水合而西北流至澮交入澮澮水

又西南與絳水合俗謂之白水非也水出絳山東案此

下近刻寒泉奮湧揚波北注懸流奔壑一十許丈案

十近刻訛作十一 青崖若點黛素湍如委練望之極為奇觀

矣其水西北流注于澮應劭曰絳水出絳縣西南蓋

以故絳為言也史記稱智伯率韓魏引水灌晉陽不

沒者三版智氏曰吾始不知水可以亡人國今乃知

之汾水可以浸安邑絳水可以浸平陽案原本及近刻並訛作汾

水可以浸平陽絳水可以浸安邑今據戰國策史記資治通鑑訂正時韓居平陽魏都

安邑魏桓子肘韓康子韓康子履魏桓子肘足接于

車上而智氏以亡魯定公問一言可以喪邦有諸孔

子以為幾乎余覩智氏之談矣汾水灌安邑或亦有

之絳水灌平陽未識所由也案原本及近刻亦安邑平陽互訛今據括地志

及胡三省注通鑑所引此文訂正

西過其縣南

春秋成公六年晉景公謀去故絳欲居郇瑕韓獻子

曰案原本及近刻六年訛作元年晉景公訛作晉悼公韓獻子訛作魏獻子今據左傳改正土薄

水淺不如新田有汾澮以流其惡遂居新田又謂之

絳即絳陽也蓋在絳澮之陽漢高帝六年封越騎將

軍華無害為侯國縣南對絳山面背二水古文瑣語

曰晉平公與齊景公乘至于澮上見乘白驂八駟以

來有大狸身而狐尾隨平公之車公問師曠對首陽

之神有大狸身狐尾其名曰者飲酒得福則徼之蓋

于是水之上也

案此有脫誤朱謀璋云太平廣記引汲冢瑣語晉平公至澮上見人乘白

駿八駟以來有狸身而狐尾去其車而墮公之車公問師曠師曠曰狸身而狐尾其名曰首陽之神飲酒

于霍太山而歸其逢君于澮乎君其有喜

又西南過虢祁宮南

宮在新田絳縣故城西四十里晉平公之所構也時

有石言于魏榆晉侯以問師曠曠曰石不能言或憑

焉臣聞之作事不時怨讟動于民則有非言之物言

也今宮室崇侈民力彫盡石言不亦宜乎叔向以為

子野之言君子矣其宮也背汾面澮

案也近刻訛作地西則

兩川之交會也竹書紀年曰晉出公五年澮絕于梁

即是水也

又西至王澤注于汾水

案澤原本及近刻茲訛作橋下注內不誤

晉智伯瑤攻趙襄子襄子奔保晉陽原過後至遇三

人于此澤自帶以下不見持竹二節與原過曰為我

遺無卹原過受之于是澤所謂王澤也

涑水出河東聞喜縣東山黍葭谷

涑水所出俗謂之華谷至周陽與洮水合水源東出

清野山世人以為清襄山也其水東逕大嶺下

案近刻脫

逕字西流出謂之哈口又西合涑水鄭使子產問晉平

公疾平公曰卜云臺駘為祟

案駘近刻訛作台下同

史官莫知

敢問子產曰高辛氏有二子長曰閼伯季曰實沈不

能相容帝遷閼伯于商丘遷實沈于大夏臺駘實沈

之後能業其官帝用嘉之國于汾川

案近刻脫于字

由是觀

之臺駘汾洮之神也賈逵曰汾洮二水名司馬彪曰

洮水出聞喜縣故王莽以縣為洮亭也然則涑水殆

亦洮水之兼稱乎

西過周陽邑南

其城南臨涑水北倚山原竹書紀年晉獻公二十五

年正月翟人伐晉周有白兔舞于市即是邑也漢景

帝以封田勝為侯國

案此下近刻有也字

涑水西逕董澤陂南

即古池東西四里南北三里春秋文公六年蒐于董

案此句下近刻衍澤字

即斯澤也涑水又與景水合水出景山

北谷山海經曰景山南望鹽販之澤北望少澤其草

多藟萹秦椒其陰多赭其陽多玉郭景純曰鹽販之

澤即解縣鹽池也按經不言有水今有水焉西北流

注于涑水也

又西南過左邑縣南案左邑縣近刻訛作其縣

涑水又西逕仲邨北又西逕桐鄉城北竹書紀年

曰翼侯伐曲沃大捷武公請成于翼案成近刻訛作城至桐

乃返者也案近刻桐訛作洞下衍庭字漢書曰武帝元鼎六年將

幸緱氏至左邑桐鄉聞南越破以為聞喜縣者也涑

水又西與沙渠水合水出東南近川西北流注于涑

水涑水又西南逕左邑縣故城南故曲沃也晉武公

自晉陽徙此秦改為左邑縣詩所謂從子于鵠者也

春秋傳曰下國有宗廟謂之國在絳曰下國矣即新

城也王莽之洮亭也涑水自城西注水流急濬輕津

無緩故詩人以為激揚之水言不能流移東薪耳水

側即狐突遇申生處也春秋傳曰秋狐突適下國遇

太子太子使登僕曰夷吾無禮吾請帝以畀秦對曰

神不歆非類君其圖之君曰諾請七日見我于新城

西偏及期而往見于此處故傳曰鬼神所憑有時而

信矣涑水又西逕王官城北城在南原上案近刻脫城字春

秋左傳成公十三年四月晉侯使呂相絕秦曰康猶

不悛入我河曲伐我涑川俘我王官故有河曲之戰是矣今世人猶謂其城曰王城也

又西南過安邑縣西

安邑禹都也禹娶塗山氏女思戀本國築臺以望之今城南門臺基猶存余按禮天子諸侯臺門隅阿相降而已未必一如書傳也故晉邑矣春秋時魏絳自魏徙此昔文侯懸師經之琴于其門以為言戒也武侯二年又城安邑蓋增廣之秦始皇使左更白起取安邑置河東郡王莽更名洮隊案近刻陽縣曰河東也

有項寧都學道升仙忽復還此河東號曰斥仙漢世

又有閔仲叔隱遁市邑罕有知者後以識瞻而去涑

水西南逕監鹽縣故城案此縣即下文所云分猗城氏安邑置縣以守之者也

南有鹽池上承鹽水案近刻訛作水承之鹽水出東南薄山西

北流逕巫咸山北地理志曰山在安邑縣南案近刻訛作東

海外西經曰巫咸國在女丑北案近刻脫國字右手操青蛇

左手操赤蛇在登葆山羣巫所從上下也大荒西經

云大荒之中有靈山巫咸巫即巫盼巫彭巫姑巫真

巫禮巫抵巫謝巫羅案近刻盼作盼真作貞禮作孔十巫從此升降

百藥爰在郭景純曰言羣巫上下靈山採藥往來也

蓋神巫所遊故山得其名矣谷口嶺上案口近刻有

巫咸祠其水又逕安邑故城南又西流注于鹽池地

理志曰鹽池在安邑西南許慎謂之鹽案近刻訛作

長五十一里廣七里周百一十六里從鹽省古聲案

刻作廣六里周一百一十四里從鹽古聲呂沈曰夙沙初作煮海鹽案近

作呂宿曰沈沙河東鹽池謂之鹽案近刻訛作謂之

今池水東西七十里南北十七里紫色澄淳潭而不

流案潭近刻水出石鹽自然印成朝取夕復終無減

損惟山水暴至雨澍潢潦奔洑案近刻訛作惟水

鹽池用耗故公私共竭水徑防其淫濫謂之鹽水亦

謂之為竭水案近刻脫謂之二字此山海經謂之鹽

販之澤也澤南面層山天巖雲秀地谷淵深案近刻

谷泉左右壁立開不容軌謂之石門路出其中名之

曰徑南通上陽北暨鹽澤案暨近刻池西又有一池

謂之女鹽澤東西二十五里南北二十里在猗氏故

城南春秋成公六年晉謀去故絳大夫曰郇瑕地沃

饒近鹽服虔曰土平有漑曰沃鹽鹽池也案此四字

鹽鹽也三字

土俗裂水沃麻

案近刻訛作土人鄉俗引水裂沃麻

分灌川野

畦水耗竭土自成鹽即所謂鹹鹺也

案鹹近刻訛作鹽

而味

苦號曰鹽田鹽鹽之名始資是矣本司鹽都尉治領

兵千餘人守之周穆王漢章帝竝幸安邑而觀鹽池

故杜預曰猗氏有鹽池後罷尉司分猗氏安邑置縣

以守之

又南過解縣東又西南注于張陽池

涑水又西逕猗氏縣故城北春秋文公七年晉敗秦

于令狐至于刳首先蔑奔秦士會從之闕駟曰令狐

即猗氏也刳首在西三十里縣南對澤即猗頓之故

居也孔叢曰猗頓魯之窮士也耕則常饑桑則常寒

聞朱公富往而問術焉朱公告之曰子欲速富當畜

五牾于是乃適西河大畜牛羊于猗氏之南十年之

閒其息不可計貲擬王公馳名天下以興富于猗氏

故曰猗頓也涑水又西逕郇城詩云郇伯勞之蓋其

故國也杜元凱春秋釋地云今解縣西北有郇城服

虔曰郇國在解縣東郇瑕氏之墟也余按竹書紀年

云晉惠公十有四年秦穆公率師送公子重耳圍令



狐桑泉曰衰皆降于秦師

案于近刻訛作焉

狐毛與先軫禦

秦至于廬柳乃謂秦穆公使公子繫來與師言退舍

次于郇盟于軍京相璠春秋土地名曰

案曰字近刻訛在春字上

桑泉曰衰竝在解東南不言解明不至解可知春秋

之文與竹書不殊今解故城東北二十四里有故城

在猗氏故城西北鄉俗名之為郇城考服虔之說又

與俗符賢于杜氏單文孤證矣涑水又西南逕解縣

故城南春秋晉惠公因秦返國許秦以河外五城內

及解梁即斯城也涑水又西南逕瑕城晉大夫詹嘉

之故邑也春秋僖公三十年秦晉圍鄭鄭伯使燭之

武謂秦穆公曰

案近刻脫穆字

晉許君焦瑕朝濟而夕設版

者也京相璠曰今河東解縣西南五里有故瑕城涑

水又西南逕張陽城東竹書紀年齊師逐鄭太子齒

奔張城南鄭者也

案張城近刻訛作城張

漢書之所謂東張矣

高祖二年曹參假左丞相別與韓信東攻魏將孫遯

軍東張

案孫下近刻衍林字

大破之蘇林曰屬河東即斯城也

涑水又西南屬于陂陂分為二城南面兩陂左右澤

渚東陂世謂之晉興澤東西二十五里南北八里南

對鹽道山其西則石壁千尋東則磻溪萬仞方嶺雲  
 迴奇峯霞舉孤標秀出罩絡羣山之表翠柏蔭峯清  
 泉灌頂郭景純云世所謂鴛漿也發于上而潛于下  
 矣厥頂方平有良藥神農本草曰地有固活女疎銅  
 芸紫苑之族也是以緇服思元之士鹿裘念一之夫  
 代往遊焉路出北巘勢多懸絕來去者咸援蘿騰峯  
 尋葛降深于東則連木乃陟百梯方降巖側縻鎖之  
 跡仍今存焉故亦曰百梯山也水自山案自近刻北  
訛作泉  
 流五里而伏云潛通澤渚所未詳也西陂即張澤也

西北去蒲坂十五里東西二十里南北四五里冬夏  
 積水亦時有盈耗也

文水出大陵縣西山文谷東到其縣屈南到平陶縣東  
 北東入于汾

文水逕大陵縣故城西而南流有泌水注之縣西南  
 山下武氏穿井給養井至幽深後一朝水溢平地案近

刻訛東南注文水文水又南逕平陶縣之故城東西

逕其城內南流出郭王莽更曰多穰也文水又南逕  
 縣右會隱泉水出謁泉山之上頂案近刻俗云賜  
脫出字

雨愆時是謁是禱故山得其名非所詳也其山石崖絕險壁立天固崖半有一石室去地可五十餘丈爰有層松飾巖列柏綺望惟西側一處得歷級升陟頂上平地十許頃沙門釋僧光表建二刹泉發于兩寺之間東流瀝石浴注山下又東津渠隱沒而不恆流故有隱泉之名矣雨澤豐澍則通入文水文水又南逕茲氏縣故城東為文湖東西十五里南北三十里世謂之西湖案近刻訛作西河在縣直東十里湖之西側臨湖又有一城謂之緒城水澤所聚謂之都亦曰緒蓋

即水以名城也文湖又東逕中陽縣故城東案晉書

地道記太康地記西河有中陽城案近刻訛作縣舊縣也文

水又東南流與勝水合水西出狐岐之山案西出近刻訛作出

西東逕六壁城南魏朝舊置六壁于其下防離石諸

胡因為大鎮太和中罷鎮仍置西河郡焉勝水又東

合陽泉水水出西山陽溪東逕六壁城北又東南流

注于勝水勝水又東逕中陽故城南又東合文水文

水又東南入于汾水也

原公水出茲氏縣西羊頭山東過其縣北

縣故秦置也漢高帝更封沂陽侯嬰為侯國王莽之  
 茲同也魏黃初二年分太原復置西河郡晉徙封陳  
 王斌于西河故縣有西河繆王司馬子政廟案近刻脫分太  
 原至故縣有凡二十字又繆訛作恭政訛作盛碑文云西河舊處山林漢末  
 擾攘百姓失所魏興更開疆宇分割太原四縣以為  
 邦邑其郡帶山側塞矣王以咸寧三年案近刻作四年改命  
 爵土明年案近刻作其年十二月喪國臣太農閻崇離石令  
 宗羣等二百三十四人刊石立碑以述勳德碑北廟  
 基尚存也

又東入于汾

水注文湖不至汾也

洞過水出沾縣北山

案魏書地形志作同過云五水合道故曰同過近刻過作渦

其水西流與南溪水合水出南山西北流注洞過水

洞過水又西北黑水西出山三源合舍

案近刻訛作三合源舍

同歸一川東流南屈逕受陽縣故城東

案近刻脫逕字按晉

太康地記樂平郡有受陽縣盧諶征艱賦所謂歷受

陽而總轡者也其水又西南入洞過水洞過水又西

蒲水南出蒲谷北流注之洞過水又西

案近刻訛作于洞渦又西

與原過水合近北便水源也案近刻訛作逕北便水流也水西阜

上有原過祠蓋懷道協靈受書天使憂結宿情傳芳

後日棟宇雖淪攢木猶茂故水取名焉案故下近刻有層巖二字

衍其水南流注于洞過水也

西過榆次縣南又西到晉陽縣南

榆次縣故涂水鄉案涂近刻訛作塗下涂陽同晉大夫智徐吾之

邑也春秋昭公八年晉侯築虎祁之宮有石言晉之

魏榆服虔曰魏晉邑榆州里名也漢書曰榆次十三

州志以為涂陽縣矣王莽之太原亭也縣南側水有

鑿臺韓魏殺智伯瑤于其下剝腹絕腸折頸摺頤處

也案近刻頸訛作頭摺訛作措其水又西南流逕武灌城西北案

近刻訛盧諶征艱賦曰逕武館之故郭問厥塗之遠

近案塗近刻洞過水又西南為淳湖謂之洞過澤案

近刻訛澤南案近刻涂水注之水出陽邑東北大曠

山涂谷西南逕蘿磨亭南與蔣谷水合水出縣東南

蔣溪魏土地記曰晉陽城東南百一十里至山有蔣

谷大道度軒車嶺通于武鄉水自蔣溪西北流西逕

箕城北春秋僖公三十三年晉人敗狄于箕杜預釋

地曰城在陽邑南水北卽陽邑縣故城也竹書紀年  
曰梁惠成王九年與邯鄲榆次陽邑者也王莽之繁  
穰矣蔣溪又西合涂水亂流西北入洞過澤也

西入于汾出晉水下口者也

劉琨之爲并州也劉曜引兵邀擊之

案劉曜近刻合  
訛作劉淵

戰于洞過卽是水也

晉水出晉陽縣西懸甕山

縣故唐國也春秋左傳稱唐叔未生其母邑姜夢帝  
謂已曰余名而子曰虞將與之唐屬之參及生名之

曰虞呂氏春秋曰叔虞與成王居王援桐葉爲珪以

授之曰吾以此封汝虞以告周公周公請曰天子封

虞乎王曰余戲耳公曰天子無戲言時唐滅乃封之

于唐縣有晉水後改名爲晉故子夏敘詩稱此晉也

而謂之唐儉而用禮有堯之遺風也晉書地道記及

十三州志並言晉水出龍山一名結紉山

案名近刻  
訛作水

在縣西北非也山海經曰懸甕之山晉水出焉今在

縣之西南昔智伯之遏晉水以灌晉陽

案水以近刻  
訛作以水

其川上游後人踵其遺跡蓄以爲沼沼西際山枕水

有唐叔虞祠水側有涼堂結飛梁于水上左右雜樹交蔭希見曦景至有淫朋密友羈遊宦子莫不尋梁契集用相娛慰于晉川之中最為勝處

又東過其縣南又東入于汾水

沼水分為二派案近刻訛作汾水分為二流北瀆即智氏故渠也

昔在戰國襄子保晉陽智氏防山以水之城不沒者三版與韓魏望歎于此故智氏用亡其瀆乘高東北注入晉陽城以周灌溉案灌近刻訛作園漢末赤眉之難郡掾劉茂負太守孫福匿于城門西下空穴中其夜奔

孟即是處也東南出城流注于汾水也其南瀆于石塘之下伏流逕舊溪東南出逕晉陽城南城在晉水之陽故曰晉陽矣案近刻脫故字經書晉荀吳帥師敗狄于大鹵杜預曰大鹵晉陽縣也為晉之舊都春秋定公十三年趙鞅以晉陽叛後乃為趙矣其水又東南流入于汾

湛水出河內軹縣西北山

湛水出軹縣南原湛溪案近刻軹訛作枳原訛作源俗謂之樞水

也案樞近刻訛作湛是蓋聲形盡鄰故字讀俱變同于三豕

之誤耳其水自溪出南流

東過其縣北又東過波縣之北案波近刻訛作皮

湛水南逕向城東而南注

又東過毋辟邑南

原經所注案原近刻訛作源斯乃湨川之所由案湨原本及近刻並訛作

汨今改正湨水詳見卷七濟水內非湛水之間關也是乃經之誤證

耳案近刻脫乃字湛水自向城東南逕湛城東時人謂之椹

城案近刻訛作湛城亦或謂之隰城矣溪曰隰澗隰城在東

言此非矣後漢郡國志曰河陽縣有湛城是也

又東南當平縣之東北案平縣原本及近刻並訛作平

平縣故城北又東湨水入焉此注云原經所注南入于

河

湛水又東南逕鄧南流注于河故河濟有鄧津之名

矣案鄧津在孟津西河水自西而東先得清水次教

水次眡水次庸庸之水乃至平陰又得濳水次至

鄧得湛水次至平縣得湨水撰水經者敘清水于平

陰下敘湛水于平縣下皆于地望不協故道元辨其

非

水經注卷六

水經注

卷六 湛水

三



水經注卷七

水經注卷七

後魏酈道元撰

濟水

濟水出河東垣縣東王屋山為沅水

山海經曰王屋之山

案近刻脫此四字

聯水出焉西北流注

于泰澤

案泰近刻訛作秦

郭景純云聯沅聲相近即沅水也

潛行地下至共山南復出于東丘今原城東北有東丘城孔安國曰泉源為沅流去為濟春秋說題辭曰濟齊也齊度也貞也風俗通曰濟出常山房子縣贊

皇山廟在東郡臨邑縣濟者齊也案近刻脫此三字齊其度

量也余按二濟同名案名下近刻衍也字所出不同鄉原亦別

案原近刻訛作源斯乃應氏之非矣今濟水重源出軹縣西

北平地案軹縣近刻訛作溫城水有二源東源出原城東北案近

刻重一城字昔晉文公伐原以信而原降即此城也俗以

濟水重源所發因復謂之濟源城其水南逕其城東

故縣之原鄉案漢書地理志軹縣孟康曰原鄉晉文公所圍是也此故縣即承上文軹縣言

杜預曰沁水縣西北有原城者是也案沁近刻訛作沈又是字訛在

也字南流與西源合西源出原城西案西字近刻訛作而東流

水注之案流字近刻訛作沈水出西南東北流注于濟濟水又

東逕原城南東合北水亂流東南注分爲二水一水

東南流俗謂之爲衍水即沈水也衍沈聲相近轉呼

失實也案轉近刻作傳濟水又東南逕絺城北而出于溫矣

案絺原本及近刻竝訛作邳今考左傳蘇忿生之田絺其一也後漢志波縣有絺城在今懷慶府西南三

十二里其一水枝津南流注于淇淇水出原城西北原

山勳掌谷案近刻脫一淇字俗謂之爲白澗水南逕原城西

春秋會于淇梁謂是水之墳梁也爾雅曰梁莫大于

淇梁梁水堤也淇水又東南逕陽城東與南源合水

出陽城南溪陽亦樊也一曰陽樊國語曰王以陽樊  
 賜晉陽人不服文公圍之倉葛曰陽有夏商之嗣典  
 樊仲之官守焉君而殘之無乃不可乎公乃出陽人  
 春秋樊氏叛惠王使虢公伐樊執仲皮歸于京師卽  
 此城也其水東北流與漫流水合水出軹關南東北  
 流又北注于湨案湨原本及近刻  
 並訛作漫今改正謂之漫流口湨水  
 又東合北水亂流東南左會濟水枝渠湨水又東逕  
 鍾繇塢北世謂之鍾公壘又東南塗溝水注之水出  
 軹縣西南山下北流東轉入軹縣故城中又屈而北

流出軹郭漢文帝元年封薄昭爲侯國也又東北流

注于湨湨水又東北逕波縣故城北漢高帝封公上

不害爲侯國案湨水所逕乃今濟源縣東南二十  
 里波城不害封汲侯或波訛作汲耳湨

水又東南流天漿澗水注之水出軹南阜案近刻訛  
 作畢下同

向城北城在阜上案近刻  
 脫城字俗謂之韓王城非也京相

璠曰或云今河內軹西有城名向案城近刻  
 訛作地今無杜

元凱春秋釋地亦言是矣蓋相襲之向故不得以地

名而無城也闕駟十三州志曰軹縣南山西曲有故

向城卽周向國也傳曰向姜不安于莒而歸者矣汲

郡竹書紀年曰鄭侯使韓辰歸晉陽及向二月城陽  
 向更名陽為河雍向為高平即是城也其水有二源  
 俱導各出一谿東北流合為一川名曰天漿谿又東  
 北逕一故城俗謂之冶城案治近刻訛水亦曰冶水  
 又東流注于淇淇水又東南流右會同水水出南原  
 下案原近刻東北流逕白騎塢南塢在原上為二谿  
 之會北帶深隍三面阻險惟西版築而已東北流逕  
 安國城西又東北注淇水淇水東南逕安國城東又  
 南逕毋辟邑西世謂之無比城亦曰馬髀城皆非也  
 朝廷以居廢太子謂之河陽庶人淇水又南注于河  
 又東至温縣西北為濟水又東過其縣北

濟水于温城西北與故瀆分南逕温縣故城西周畿  
 內國司寇蘇忿生之邑也春秋僖公十年狄滅温温  
 子奔衛周襄王以賜晉文公濟水南歷虢公臺西皇  
 覽曰温城南有虢公臺基趾尚存濟水南流注于河  
 郭緣生述征記曰濟水案近刻河內温縣注于河蓋  
 沿歷之實證非為謬說也濟水故瀆于温城西北東  
 南出逕温城北又東逕虢公冢北皇覽曰虢公冢在

温縣郭東濟水南大冢是也濟水當王莽之世川瀆

枯竭其後水流逕通津渠勢改尋梁脈水不與昔同

屈從縣東南流過隕城西案隕近刻訛作墳下同又南當鞏縣北

南入于河

濟水故瀆東南合奉溝水水上承朱溝于野王城西

東南逕陽鄉城北案此下近刻重又東南流逕陽鄉城北九字又東南逕

李城西秦攻趙邯鄲且降傅舍吏子李同說平原君

勝分家財饗士得敢死者三千人李同與赴秦軍秦

軍退同死案近刻作李同死封其父為李侯故徐廣曰河內

平臯縣有李城卽此城也于城西南為陂水淹地百

許頃兼葭萑葦生焉號曰李陂又逕隕城西屈而東

北流逕其城北又東逕平臯城南應劭曰邢侯自襄

國徙此當齊桓公時衛人伐邢邢遷于夷儀其地屬

晉號曰邢丘以其在河之臯勢處平夷案近刻訛作處勢平夷

故曰平臯瓚注漢書云春秋狄人伐邢邢遷夷儀不

至此也案近刻脫也字今襄國西有夷儀城去襄國百餘里

平臯是邢丘非國也余按春秋宣公六年赤狄伐晉

圍邢丘昔晉侯送女于楚送之邢丘卽是此處也非

無城之言竹書紀年曰梁惠成王三年鄭城邢丘司

馬彪後漢郡國志云縣有邢丘故邢國周公子所封

矣漢高帝七年案近刻訛作六年封碭郡長項佗為侯國案佗

近刻訛作伯賜姓劉氏武帝以為縣其水又南注于河也

與河合流又東過成臯縣北又東過滎陽縣北又東至

礫谿南案原本及近刻並作又東至北礫谿南北字後人所加漢書溝洫志顏師古引水經沛水東過

礫谿無北字可證辯又詳注內東出過滎澤北案滎澤原本及近刻並訛作滎陽今考此即注

內所謂滎澤在滎陽縣東南者也

釋名曰濟濟也源出河北濟河而南也晉地道志曰

濟自大伾入河與河水鬪南決為滎澤尚書曰滎波

既瀦孔安國曰滎澤波水已成遏瀦案近刻脫瀦字過字闕駟

曰滎播案近刻訛作滎波澤名也故呂忱云播水在滎陽謂

是水也昔大禹塞其淫水而于滎陽下引河東南以

通淮泗濟水分河東南流漢明帝之世司空伏恭薦

樂浪人王景字仲通好學多藝善能治水顯宗詔與

謁者王吳案原本及近刻並訛作吳下同今改正始作浚儀渠吳用景

法水乃不害此即景吳所脩故瀆也案吳近刻訛作作渠流

東注浚儀故復謂之浚儀渠案此下近刻有也字明帝永平十

五年東巡至無鹽帝嘉景功拜河堤謁者

案此下近刻有漢字

靈帝建寧四年于敖城西北壘石為門以遏渠口謂

之石門故世亦謂之石門水門廣十餘丈西去河三

里石銘云建寧四年十一月黃場石也而主吏姓名

磨滅不可復識

案朱謀埠云玉海引水經注浚儀縣竹書紀年梁惠成王三十一年三月

為大溝于北邽以行圃田之水陳留風俗傳曰縣北有浚水像而儀之故曰浚儀續述征記曰汴河到浚儀而分汴東注河南流建寧四年于敖城西北壘石為門以遏渠口謂之石門故世亦謂之石門水門廣十餘丈西去河三里石銘云建寧四年十一月黃場石魏太和中又更脩之撤故增新石字淪落無復在者水北有石門亭戴延之

所云新築城城周二百步

案城周近刻訛作周城

滎陽太守所

鎮者也水南帶三皇山

案近刻脫皇字

即皇室山亦謂之為

三室山也濟水又東逕西廣武城北

案此十字原本及近刻並訛作

經考廣武二城敖山及滎瀆所入皆值滎陽縣之西不得與經滎瀆今改正

郡國志滎陽

縣有廣武城城在山上漢所城也高祖與項羽臨絕

澗對語責羽十罪羽射漢祖中胸處也山下有水北

流入濟世謂之柳泉也濟水又東逕東廣武城北

十字原本及近刻並訛作經

楚項羽城之漢破曹咎羽還廣武為

高壇

案近刻訛作祖朱謀璋云宋本作祖

置太公其上曰漢不下吾烹

之高祖不聽將害之項伯曰為天下者不顧家但益

怨耳羽從之今名其壇曰項羽堆夾城之間有絕澗

斷山謂之廣武澗項羽叱婁煩于其上婁煩精魄喪

歸矣濟水又東逕敖山北案此八字原本及近刻並訛作經詩所謂

薄狩于敖者也案今詩作捕獸于敖其山上有城即殷帝仲丁

之所遷也皇甫謐帝王世紀曰仲丁自亳徙囂于河

上者也或曰敖矣秦置倉于其中故亦曰敖倉城也

濟水又東合滎瀆案此七字原本及近刻並訛作經又滎瀆近刻訛作滎澤瀆首

受河水案首近刻訛作水有石門謂之為滎口石門也而地

形殊卑蓋故滎播所導自此始也門南際河有故碑

云惟陽嘉三年二月丁丑使河堤謁者王誨疏達河

川通荒庶土案通近刻作述往大河衝塞案往近刻訛作云侵齧金

堤以竹籠石葺土而為竭案近刻石下衍葺字壞隕無已功消

億萬請以濱河郡徒疏山采石壘以為障功業既就

徭役用息未詳詔書許誨立功府卿案近刻訛作鄉規基經

始詔策加命案策近刻訛作滎遷在沅州乃簡朱軒授使司

馬登令纘茂前緒稱遂休功登以伊洛合注大河南

則緣山東過大伾回流北岸其勢鬱濛濤怒湍急激



疾一有決溢彌原淹野蟻孔之變害起不測蓋自姬氏之所常蹙昔崇鯨所不能治我二宗之所劬勞于是乃跋涉躬親經之營之比率百姓議之于臣伐石三谷水匠致治立激岸側以捍鴻波隨時慶賜說以勸之川無滯越水土通演役未踰年而功程有畢斯乃元勲之嘉課上德之弘表也昔禹脩九道書錄其功后稷躬稼詩列于雅夫不憚勞謙之勤夙興厥職充國惠民安得湮沒而不章焉故遂刊石記功垂示于後其辭云云使河堤謁者山陽東緡司馬登案緡近刻

訛作昏

字伯志代東萊曲成王誨

案曲成近刻訛作典城

字孟堅

河內太守宋城向豹

案近刻訛作守城向豹

字伯尹丞汝南鄧

方字德山懷令劉丞字季意河堤掾匠等造陳畱浚儀邊韶字孝先頌石銘歲遠字多淪缺其所滅蓋闕如也滎瀆又東南流注于濟案原本及近刻竝訛作浦今改正今無水次東得宿須水口水受大河渠側有扈亭水案亭近刻訛作自亭東南流注于濟今無水宿須在河之北不在此也蓋名同耳自西緣帶山隰秦漢以來亦有通否濟水與河渾濤東注晉太和中桓溫北伐將通之

不果而還義熙十三年劉公西征又命寧朔將軍劉

遵考仍此渠而漕之始有激湍東注而終山崩壅塞

劉公于北十里更鑿故渠通之今則南瀆通津案今

訛作合 川澗是導耳濟水于此又兼邲目春秋宣公十

三年晉楚之戰楚軍于邲卽是水也音卞案音近刻

京相璠曰在敖北濟水又東逕滎陽縣北案此九字

刻竝訛作經今考自濟水分河東南原本及近

流至此則經所謂過滎陽縣北也 曹太祖與徐榮

戰不利曹洪授馬于此處也濟水又東礫石溪水注

之案此十字原本及近刻竝訛作經礫石溪上又加

南字胡渭禹貢錐指云上有北礫溪故此爲南礫

溪石字衍考下云世謂之礫石澗則石字非衍明矣

經言礫溪于滎陽縣下此亦言于滎陽縣下豈有兩

滎陽縣乎後人不察前屬經文水出滎陽城西南李

澤澤中有水卽古馮池也地理志曰滎陽縣馮池在

西南是也東北流歷敖山南春秋晉楚之戰設伏于

敖前謂是也逕號亭北池水又東北逕滎陽縣北斷

山東北注于濟世謂之礫石澗卽經所謂礫溪矣經

云濟出其南非也案濟東流而礫溪東北注之則濟

至其北經不當云又東至礫溪南

故道元 濟水又東索水注之案此八字原本及

近刻竝訛作經 水出

京縣西南嵩渚山與東關水同源分流案近刻訛作

與東關分水

卽古旃然水也案近刻脫然字其水東北流器難之水注之  
山海經曰少陘之山器難之水出焉而北流注于侵  
水卽此水也其水北流逕金亭又北逕京縣故城西  
入于旃然之水城故鄭邑也莊公以居弟段號京城  
大叔祭仲曰京城過百雉國之害也城北有壇山岡  
趙世家成侯二十年魏獻滎陽因以爲壇臺岡也其  
水亂流北逕小索亭西京相璠曰京有小索亭世語  
以爲本索氏兄弟居此故號小索者也又爲索水索  
水又北逕大柵城東晉滎陽民張卓董邁等遭荒鳩

聚流雜保固

案近刻訛作流離堡固

名爲大柵塢至太平真君

八年豫州刺史崔白

案豫近刻訛作穎

自虎牢移州治此又

東開廣舊城創制改築焉太和十七年遷都洛邑省  
州置郡索水又屈而西流與梧桐澗水合水出西南  
梧桐谷東北流注于索斯水亦時有通塞而不常流  
也索水又北屈東逕大索城南春秋傳曰鄭子皮勞  
叔向于索氏案近刻訛作水卽此城也晉地理志所謂京有  
大索小索亭漢書京索之間也索水又東逕號亭南  
應劭曰滎陽故號公之國也今號亭是矣司馬彪案近

刻訛作郡國志曰縣有號亭俗謂之平桃城案桃近

故馬淵城內有大家名管叔冢或亦謂之為號眺城非也

蓋號號字相類字轉失實也風俗通曰俗說高祖與

項羽戰于京索遁于薄中羽追求之時鳩止鳴其上

追之者以為必無人遂得脫及即位異此鳩故作鳩

杖以扶老案廣志楚鳩一名嗥啁號眺之名蓋因鳩

以起目焉所未詳也索水又東北流須水右入焉水

近出京城東北二里榆子溝亦曰柰榆溝也又或謂

之為小索水東北流木蓼溝水注之水上承京城南

淵世謂之車輪淵淵水東北流謂之木蓼溝又東北

入于須水須水又東北流于滎陽城西南北注索索

水又東逕滎陽縣故城南漢王之困滎陽也紀信曰

臣詐降楚王宜閒出信乃乘王車出東門稱漢降楚

楚軍稱萬歲震動天地王與數十騎出西門得免楚

圍羽見信大怒遂烹之信冢在城西北三里故蔡伯

喈述征賦曰過漢祖之所隘弔紀信于滎陽其城跨

倚岡原居山之陽王莽立為祈隊案祈近刻備周六

隊之制魏正始三年歲在甲子被癸丑詔書割河南

郡縣自鞏闕以東

案鞏字近刻  
訛在縣字上

創建滎陽郡并戶二

萬五千以南鄉筑陽亭侯李勝字公昭

案近刻  
訛作照為郡

守故原武典農校尉

案故近刻  
訛作顧

政有遺惠民為立祠

于城北五里號曰李君祠廟前有石蹠蹠上有石的

石的銘具存其略曰百族欣戴咸推厥誠今猶祀禱

焉索水又東逕周苛冢北漢祖之出滎陽也令御史

大夫周苛守之項羽拔滎陽獲苛曰吾以公為上將

軍封三萬戶侯能盡節乎苛瞋目罵羽羽怒烹之索

水又東流北屈西轉北逕滎陽城東而北流注濟水

杜預曰旃然水出滎陽成臯縣東入汜春秋襄公十

八年楚伐鄭右師涉潁次于旃然即是水也濟渠水

斷汜溝惟承此始故云汜受旃然矣

案汜近刻  
訛作吸

亦謂

之鴻溝水蓋因漢楚分王指水為斷故也郡國志曰

滎陽有鴻溝水是也蓋因城地而變名為川流之異

目濟水又東逕滎澤北

案此即經所謂東出過滎澤  
北也原本及近刻並作滎陽

澤陽字衍故滎水所都也京相璠曰滎澤在滎陽縣東南

與濟隧合濟隧上承河水于卷縣北河南逕卷縣故

城東又南逕衡雍城西春秋左傳襄公十一年諸侯

伐鄭西濟于濟隧杜預闕其地而曰水名也

案近刻訛作而

名之京相璠曰鄭地也言濟水滎澤中北流至衡雍水也

西與出河之濟會南去新鄭百里斯蓋滎播河濟往

復徑通矣

案徑近刻作逕

出河之濟即陰溝之上源也濟隧

絕焉故世亦或謂其故道為十字溝自于岑造八激

堤于河陰水脈徑斷故瀆難尋又南會于滎澤然水

既斷民謂其處為滎澤春秋衛侯及翟人戰于滎澤

而屠懿公宏演報命納肝處也有垂隴城濟瀆出其

北春秋文公二年晉士穀盟于垂隴者也京相璠曰

垂隴鄭地今滎陽東二十里有故垂隴城

案近刻脫垂字即

此是也世謂之都尉城蓋滎陽典農都尉治故變垂

隴之名矣瀆際又有沙城

案瀆近刻訛作澤

城左佩濟瀆竹

書紀年梁惠成王九年王會鄭釐侯于巫沙者也瀆

際有故城世謂之水城

案近刻脫之字又此句之下衍非也二字

史記秦

昭王三十二年

案近刻訛作四十二年

魏冉攻魏走芒卯入北

宅即故宅陽城也竹書紀年曰惠成王十三年

案近刻脫

成字王及鄭釐侯盟于巫沙以釋宅陽之圍歸釐于鄭

者也竹書紀年晉出公六年齊鄭伐衛荀瑤城宅陽

俗言水城非矣濟水自澤東出卽是始矣王隱曰河

決為滎濟水受焉故有濟堤矣謂此濟也案近刻訛作為北濟

也濟水又東南逕釐城東春秋經書公會鄭伯于時

來左傳所謂釐也京相璠曰今滎陽縣東四十里有

故釐城也濟水右合黃水案右近刻訛作又水發源京縣黃

堆山案近刻訛作黃淮止東南流名祝龍泉泉勢沸湧狀若巨

鼎揚湯案近刻訛作湯湯西南流謂之龍項口世謂之京水

也又屈而北注魚子溝水入焉水出石暗澗東北流

又北與漑漑水合水出西溪東流水上有連理樹其

樹柞櫟也案近刻脫樹字南北對生凌空交合溪水歷二樹

之間東流注于魚水魚水又屈而西北注黃水黃水

又北逕高陽亭東又北至故市縣重泉水注之水出

京城西南少陘山案少陘近刻訛作小陸東北流又北流逕高

陽亭西東北流注于黃水又東北逕故市縣故城南

漢高帝六年案漢近刻訛作溪封閭澤赤為侯國河南郡之

屬縣也案近刻脫河黃水又東北至滎澤南分為二

水一水北入滎澤下為船塘俗謂之郊城陂東西四

十里南北二十里竹書穆天子傳曰甲寅案近刻訛作甲辰

天子浮于滎水乃奏廣樂是也一水東北流即黃雀

溝矣穆天子傳曰壬寅天子東至于雀梁者也又東

北與靖水枝津合二水之會為黃淵案近刻訛作泉北流注

于濟水

又東過陽武縣南案原本及近刻竝訛作縣北考南濟在陽武南其在陽武北者乃北濟觀

道元于此下叙南濟所逕而北濟則追叙於後封丘下經本作縣南明矣今改正

濟水又東南流入陽武縣歷長城東南流蒗蕩渠出

焉濟水又東北流南濟也逕陽武縣故城南案此十六字原

本及近刻竝訛作經今考上下文乃注內叙南濟所逕而此句則釋經所謂東過陽武縣南也王莽

更名之曰楊桓矣又東為白馬淵淵東西二里南北

百五十步淵流名為白馬溝案近刻淵作泉脫馬字又東逕房

城北穆天子傳曰天子里甫田之路東至于房疑即

斯城也郭注以為趙郡房子也余謂穆王里鄭甫而

郭以趙之房邑為疆更為非矣濟水又東逕封丘縣

南案此九字原本及近刻竝訛作經今考此注內敘南濟所逕又東逕大梁城北

又東逕倉垣城又東逕小黃縣之故城北縣有黃亭

說濟又謂之曰黃溝案此句之上當有脫文未詳縣故陽武之東

黃鄉也故水以名縣案此句亦有脫誤沛公起兵野戰喪皇



妣于黃鄉天下平定乃使使者以梓宮招魂幽野于

是丹蛇自水濯洗案蛇近刻訛作旄入于梓宮其浴處有遺

髮焉故諡曰昭靈夫人因作寢以寧神也濟水又東

逕東昏縣故城北案此十一字原本及近刻並訛作經今考亦注內敘南濟所逕陽

武縣之戶牖鄉矣漢丞相陳平家焉平少為社宰以

善均肉稱今民祠其社平有功于高祖封戶牖侯是

後置東昏縣也王莽改曰東明矣濟水又東逕濟陽

縣故城南案此十一字原本及近刻並訛作經今考亦注內敘南濟所逕故武父城

也城在濟水之陽故以為名王莽改之曰濟前者也

光武生濟陽宮光明照室即其處也東觀漢記曰光

武以建平元年生于濟陽縣是歲有嘉禾生一莖九

穗大于凡禾縣界大熟因名曰秀

又東過封丘縣北

北濟也案此三字原本及近刻並訛作經考濟自滎澤流出有南濟北濟之分南濟行陽武封丘

濟陽冤胸定陶之南而不逕其北北濟則行陽武封

丘東過陽武南封丘北平丘南濟陽北冤胸定陶南

道元不顯言其非因于過陽武南下敘南濟逕陽武

封丘濟陽南于過封丘北平丘南濟陽北下皆以北

濟釋之于過冤胸定陶南下又敘南濟所逕其北濟

之逕冤胸定陶北則補敘于從乘氏縣東北流入鉅

野澤下經雖舛誤注內分南濟北濟各有條理自注

多訛為經于是愈益淆案不可讀今詳為訂正自滎澤東逕滎陽卷縣之武

脩亭南春秋左傳成公十年鄭子然盟于脩澤者也

鄭地矣杜預曰卷東有武脩亭濟水又東逕原武縣

故城南案此十一字原本及近刻並訛作經考原武在陽武封丘之西乃注內敘北濟所逕不得與經淆

今改正春秋之原圃也穆天子傳曰祭父自圃鄭

來謁天子夏庚午天子飲于洧上乃遣祭父如圃鄭

是也王莽之原桓矣濟瀆又東逕陽武縣故城北又

東絕長城案此下近刻有築也二字衍按竹書紀年梁惠成王十

二年龍賈率師築長城于西邊自亥谷以南鄭所城

矣竹書紀年云是梁惠成王十五年築也案近刻郡脫成字

國志曰長城自卷逕陽武到密者是矣濟瀆又東逕

酸棗縣之烏巢澤北案近刻脫一澤字又此十四字原本及近刻並訛作經考

烏巢澤在陽武東封丘西亦注內敘北濟所逕有故市亭案近刻脫市字晉太康地

記曰澤在酸棗之東南昔曹太祖納許攸之策破袁

紹運處也濟瀆又東逕封丘縣北案近刻脫北字南燕縣之

延鄉也其在春秋為長丘焉應劭曰左傳宋敗狄于

長丘獲長狄緣斯是也漢高帝封翟盱為侯國案近刻脫

此三字 濮水出焉濟瀆又東逕大梁城之赤亭北而東

注

又東過平丘縣南

北濟也

案此三字原本及近刻並訛作經

縣故衛地也春秋魯昭公

十三年諸侯盟于平丘是也縣有臨濟亭田儋死處

也又有曲濟亭皆臨側濟水者

案此句六字原本及近刻並截下三字訛

作經上三字仍屬注文

又東過濟陽縣北

北濟也

案原本及近刻並脫北字下二字訛作經今補正

自武父城北

案此下原

本及近刻並有圈稱曰三字因下文闕駟曰在縣西即引圈稱陳畱風俗傳故訛而致衍

北鄭邑也東逕濟陽縣故城北圈稱陳畱風俗傳曰

縣故宋地也竹書紀年梁惠成王三十年城濟陽漢

景帝中六年

案中下近刻衍元字

封梁孝王子明為濟川王應

劭曰濟川今陳畱濟陽縣

案近刻脫畱字

是也

又東過冤胸縣南又東過定陶縣南

南濟也

案此三字原本及近刻並訛作經

濟瀆自濟陽縣故城南東

逕戎城北春秋隱公二年公會戎于潛杜預曰陳畱

濟陽縣東南有戎城是也濟水又東北蒗水東出焉

案此十字原本及近刻並訛作經今考濟別出為蒗值冤胸之西乃注內追敘南濟所逕

東北逕冤胸縣故城南呂后元年封楚元王子劉執

為侯國王莽之濟平亭也濟水又東逕秦相魏冉冢

南案此十一字原本及近刻並訛作經今考魏冉冢恭王陵皆值冤胸之東定陶之西亦注內敘南濟

所冉秦宣太后弟也代客卿壽燭為相封于穰益封

于陶號曰穰侯富于王室范雎說秦秦王悟其擅權

免相就封出關輜車千乘卒于陶而因葬焉世謂之

安平陵墓南崩碑尚存濟水又東北逕定陶恭王陵

南案此十二字原本及近刻並訛作經漢哀帝父也帝即位母丁太后

建平二年崩上曰宜起陵于恭皇之園送葬定陶貴

震山東王莽秉政貶號丁姬開其槨戶火出炎四五

丈吏卒以水沃滅乃得入燒燔槨中器物公卿遣子

弟及諸生四夷十餘萬人操持作具助將作掘平共

王母傅太后墳及丁姬冢二旬皆平莽又周棘其處

以為世戒云時有羣燕數千銜土投于丁姬竈中今

其墳冢巍然尚秀隅阿相承列郭數周面開重門南

門內夾道有崩碑二所世尚謂之丁昭儀墓又謂之

長隧陵蓋所毀者傅太后陵耳丁姬墳墓事與書違

不甚過毀未必一如史說也墳南案墳近刻魏郡治

也世謂之左城亦名之曰葬城蓋恭王之陵寢也濟

水又東北逕定陶縣故城南案此十二字原本及近刻並訛作經側城

東注案此下近刻衍也字縣故三駸國也湯追桀伐三駸即此

周武王封弟叔振鐸之邑故曹國也漢宣帝甘露二

年更濟陰為定陶國王莽之濟平也戰國之世范蠡

既雪會稽之恥乃變姓名寓于陶為朱公以陶天下

之中諸侯四通貨物之所交易也治產致千金富好

行德子孫修業遂致巨萬故言富者皆曰陶朱公也

又屈從縣東北流

南濟也案此三字原本及近刻並訛作經及東北右合菏水案菏原本及近

刻並訛作河下同水上承濟水于濟陽縣東世謂之五丈溝

又東逕陶丘北地理志曰禹貢陶丘在定陶西南案近

刻訛作禹貢定陶丘亭在南墨子以為釜丘也竹書

紀年魏襄王十九年薛侯來會王于釜丘者也尚書

所謂導菏水自陶丘北謂此也菏水東北出于定陶

縣北屈左合汜水汜水西分濟瀆東北逕濟陰郡南

爾雅曰濟別為澨呂忱曰水決復入為汜案爾雅乃汜字音似

與此處汜水下云取其廣異名也汜水又東合于菏

瀆昔漢祖既定天下即帝位于定陶汜水之陽張晏  
 曰汜水在濟陰界取其汜愛弘大而潤下也汜水之  
 名案近刻脫之字于是乎在矣荷水又東北案荷原本訛作河近刻訛作汜  
 逕定陶縣南又東北右合黃水枝渠渠上承黃溝東  
 北合荷而北注濟瀆也

水經注卷七

水經注卷八

後魏酈道元撰

濟水

案二字原本訛作經文又東上近刻又增濟水二三字表目

又東至乘氏縣西分為二

春秋左傳僖公三十一年

案原本訛作二十八年近刻訛作三十四年今據左

傳改

分曹地東傳于濟濟水自是東北流

案近刻訛作北東流

出鉅澤

其一水東南流其一水從縣東北流入鉅野澤

案此十字原

本及近刻並訛入注內接出鉅澤下今考下云經所謂濟水自乘氏縣兩分東北入于鉅野也可證此屬經文

水經注

卷八 濟水

南為河水北為濟瀆案此八字原本及近刻並訛作經逕乘氏縣與

濟渠濮渠合北濟自濟陽縣北東北逕煮棗城南郡

國志曰冤胸縣有煮棗城即此也漢高祖十二年封

革朱為侯國北濟又東北逕冤胸縣故城北案此十

本及近刻並訛作經今考前卷注內敘北濟至濟陽止此復補敘濟陽以下北濟所逕又東北

逕呂都縣故城南王莽更名之曰祁都也又東北逕

定陶縣故城北漢景帝中六年案此三字近刻作中元六年又訛在東注

下以濟水出其北東注分梁于定陶置濟陰國指北

濟而定名也案近刻國訛作郡北訛作爲又東北與濮水合案此七字

原本及近刻並訛作經水上承濟水于封丘縣即地理志所謂

濮渠水首受濟者也闕駟曰首受別濟即北濟也其

故瀆自濟東北流左池為高粱陂方三里濮水又東

逕匡城北孔子去衛適陳遇難于匡者也又東北左

會別濮水受河于酸棗縣故杜預云濮水出酸棗縣

首受河竹書紀年曰魏襄王十年十月大霖雨疾風

河水溢酸棗郭漢世塞之故班固云文堙棗野案近

作大堙酸棗也今無水其故瀆東北逕南北二棣城間左傳

襄公五年楚子囊伐陳公會于城棣以救之者也濮

渠又東北逕酸棗縣故城南韓國矣圈稱曰昔天子

建國名都或以令名案合近刻或以山林故豫章以

樹氏郡案近刻酸棗以棘名邦故曰酸棗也漢官儀

曰舊河堤謁者居之城西有韓王望氣臺孫子荆故

臺賦敘曰酸棗寺門外夾道左右有兩故臺訪之故

老云案故近刻韓王聽訟觀臺高十五仞雖樓榭泯

滅然廣基似于山嶽召公大賢猶舍甘棠區區小國

而臺觀隆崇驕盈于世以鑒來今故作賦曰蔑丘陵

之邇池亞五嶽之嵯峨言壯觀也城北韓之市地也

聶政為濮陽嚴仲子刺韓相俠累遂皮面而死案皮近刻

訛作披其姊哭之于此城內有後漢酸棗令劉孟陽碑

濮水北積成陂案積近刻陂方五里號曰同池陂又

東逕胙亭東注故胙國也富辰所謂邢茅胙祭周公

之冑也濮渠又東北逕燕城南案近刻故南燕姞姓

之國也有北燕故以南氏縣東為陽清湖陂南北五

里東西三十里亦曰燕城湖逕桃城南即戰國策所

謂酸棗虛桃者也案虛桃近刻漢高帝十二年封

劉襄為侯國而東注于濮俗謂之朝平溝濮渠又東



北又與酸水故瀆會酸瀆首受河于酸棗縣東逕酸  
棗城北延津南謂之酸水竹書紀年曰秦蘇胡率師  
伐鄭韓襄敗秦蘇胡于酸水者也酸瀆水又東北逕  
燕城北又東逕滑臺城南又東南逕瓦亭南春秋定  
公八年公會晉師于瓦魯尚執羔自是會始也又東  
南會于濮世謂之百尺溝濮渠之側有漆城竹書紀  
年梁惠成王十六年邯鄲伐衛取漆富丘城之者也  
或亦謂之宛濮亭案宛近刻作苑下春秋甯武子與  
同又訛在濮字下衛人盟于宛濮杜預曰長垣西南案西近刻  
訛作而近濮水

也京相璠曰衛地也似非關宛

案近刻  
訛作苑

而不知其所

竹書紀年梁惠成王五年公子景賈率師伐鄭韓明

戰于陽我師敗逋澤北有壇陵亭

案近刻  
脫有字

亦或謂之

大陵城非所究也又有桂城竹書紀年梁惠成王十  
七年齊田期伐我東鄙戰于桂陽我師敗逋亦曰桂  
陵案史記齊威王使田忌擊魏敗之桂陵齊于是疆  
自稱為王以令天下濮渠又東逕蒲城北故衛之蒲  
邑孔子將之衛子路出于蒲者也韓子曰魯以仲夏  
起長溝子路為蒲宰以私粟饋衆孔子使子貢毀其

器焉余案家語言仲由為邱宰案近刻訛脩溝瀆與

之簞食瓢飲夫子令賜止之無魯字又入其境三稱

其善身為大夫終死衛難濮渠又東逕韋城南即白

馬縣之韋鄉也史遷記曰夏伯豕韋之故國矣城西

出而不方城中有六大井皆隧道下俗謂之江井也

有馳道自城屬于長垣濮渠東絕馳道東逕長垣縣

故城北衛地也故首垣矣秦更從今名王莽改為長

固縣陳畱風俗傳曰縣有防垣故縣氏之孝安帝以

建光元年封元舅宋俊為侯國縣有祭城濮渠逕其

北鄭大夫祭仲之邑也杜預曰陳畱長垣縣東北有

祭城者也圈稱又言長垣縣有羅亭故長羅縣也漢

封後將軍常惠為侯國地理志曰王莽更長羅為惠

澤後漢省并長垣有長羅澤即吳季英牧豬處也又

有長羅岡蘧伯玉岡陳畱風俗傳曰長垣縣有蘧伯

鄉一名新鄉有蘧亭伯玉祠伯玉冢曹大家東征賦

曰到長垣之境界兮察農野之居民覩蒲城之丘墟

兮生荆棘之萋萋蘧氏在城之東南兮民亦嚮其丘

墳案嚮近刻訛作饗惟令德之不朽兮身既沒而名存昔吳

季札聘上國至衛觀典府賓亭父疇以衛多君子也  
濮渠又東分爲二瀆北濮出焉濮渠又東逕須城北  
衛詩云思須與曹也毛云須衛邑矣鄭云自衛而東  
逕邑故思濮渠又北逕襄丘亭南竹書紀年曰襄王  
七年韓明率師伐襄丘九年案近刻訛楚庶章率師  
來會我次于襄丘者也濮水又東逕濮陽縣故城南  
昔師延爲紂作靡靡之樂武王伐紂師延東走自投  
濮水而死矣後衛靈公將之晉而設舍于濮水之上  
夜聞新聲召師涓受之于是水也濮水又東逕濟陰

離狐縣故城南王莽之所謂瑞狐也郡國志曰故屬

東郡濮水又東逕葭密縣故城北竹書紀年元公三

年案近刻訛作魯季孫會晉幽公于楚丘案幽公近

公取葭密案取近刻遂城之濮水又東北逕鹿城南

郡國志曰濟陰乘氏縣有鹿城鄉案城近刻春秋僖

公二十一年盟于鹿上京杜竝謂此亭也濮水又東

與句瀆合案近刻脫瀆首受濮水枝渠于句陽縣東

南逕句陽縣故城南春秋之穀丘也左傳以爲句瀆

之丘矣縣處其陽故縣氏焉又東入乘氏縣左會濮

水與濟同入鉅野故地理志曰濮水自濮陽南入鉅

野亦經所謂濟水自乘氏縣兩分東北入于鉅野也

濟水故瀆又北右合洪水案此十字原本及近刻茲訛作經水上承

鉅野薛訓渚歷澤西北案此下近刻衍渚字又北逕闕鄉城西

春秋桓公十有一年經書公會宋公于闕郡國志曰

東平陸有闕亭皇覽曰蚩尤冢在東郡壽張縣闕鄉

城中冢高七尺常十月祠之有赤氣出如絳民名為

蚩尤旗十三州志曰壽張有蚩尤祠又北與濟瀆合

案近刻脫與字自渚迄于北口百二十里名曰洪水桓溫以

太和四年率衆北入掘渠通濟至義熙十三年劉武

帝西入長安又廣其功自洪口已上又謂之桓公瀆

濟自是北注也春秋莊公十八年經書夏公追戎于

濟西京相璠曰濟水自鉅野至濟北是也

又東北過壽張縣西界安民亭南汶水從東北來注之

濟水又北汶水注之戴延之所謂清口也郭緣生述

征記曰清河首受洪水北注濟案注近刻訛作流或謂清即

濟也禹貢濟東北會于汶今枯渠注鉅澤鉅澤北則

清口案近刻訛作水清水與汶會也李欽曰汶水出太山萊

燕縣西南入濟是也濟水又北逕梁山東袁宏北征

賦曰背梁山截汶波即此處也劉澄之引是山以證

梁父為不近情矣山之西南有呂仲悌墓河東岸有

石橋橋本當河河移故廟岸也案廟近刻作側古老言此橋

東海呂母起兵所造也北山三里有呂母宅宅東三

里即濟水濟水又北逕須胸城西案此九字原本及近刻並訛作經

城臨側濟水故須胸國也案近刻作故春秋僖公二

十一年子魚曰任宿須胸顓臾風姓也寔司太皞與

有濟之祀案此非子魚語道元偶誤引耳朱謀埠云左傳楚執宋公以伐宋冬會于薄以釋之

子魚曰禍猶未也未足以懲君則子魚之語已卒于此其任宿須胸等語別自更端為邾人滅須胸張本

杜預曰須胸在須昌縣西北非也地理志曰壽張西

北有胸城者是也濟水西有安民亭亭北對安民山

東臨濟水水東即無鹽縣界也山西有冀州刺史王

紛碑漢中平四年立濟水又北逕微鄉東案此八字原本及近

刻並訛春秋莊公二十八年經書冬築鄒京相璠曰

公羊傳謂之微案此下近刻衍在字東平壽張縣西北三十里

有故微鄉魯邑也杜預曰有微子冢濟水又北分為

二水其枝津西北出案此下近刻有焉字謂之馬頰水者也

又北過須昌縣西

京相璠曰須胸一國二城兩名蓋遷都須昌胸是其

本秦以為縣漢高帝十一年封趙衍為侯國濟水于

縣趙溝水注之濟水又北逕魚山東左合馬頰水案

十三字原本及近刻並訛作經水首受濟西北流歷安民山北又西

流趙溝出焉東北注于濟馬頰水又逕桃城東春秋

桓公十年經書公會衛侯于桃丘衛地也杜預曰濟

北東阿縣東南有桃城案近刻脫城字即桃丘矣馬頰水又

東北流逕魚山南案近刻脫魚字山即吾山也漢武帝瓠子

歌所謂吾山平者也山上有柳舒城案柳近刻訛作抑魏東

阿王曹子建每登之有終焉之志及其終也葬山西

西去東阿城四十里案城近刻訛作水其水又東注于濟案

刻濟上謂之馬頰口也濟水自魚山北逕清亭東案

十字原本及近刻並訛作經春秋隱公四年公及宋公遇于清案

下近刻衍京相璠曰今濟北東阿東北四十里有故

清亭即春秋所謂清者也是下濟水通得清水之目

焉案近刻脫下字亦水色清深用兼厥稱矣是故燕王曰吾

聞齊有清濟濁河以為固案濁近刻訛作濟即此水也

又北過穀城縣西

濟水側岸有尹卯壘南去魚山四十餘里是穀城縣界故春秋之小穀城也齊桓公以魯莊公二十三年城之邑管仲焉城內有夷吾井魏土地記曰縣有穀城山山出文石陽穀之地春秋齊侯宋公會于陽穀者也縣有黃山臺案縣近刻訛作穀黃石公與張子房期處也又有狼水出東南大檻山狼溪案此下近刻有西北逕穀城西又北有西流泉出城東近山西北逕穀城北西注狼水以其流西故即名焉又西北入濟水

案近刻訛作清水城西北三里有項王羽之冢半許毀壞石

碣尚存題云項王之墓皇覽云冢去縣十五里謬也

今彭城穀陽城西南又有項羽冢非也余按史遷記

魯為楚守漢王示羽首魯乃降遂以魯公禮葬羽于

穀城寧得言彼也濟水又北逕周首亭西案此九字原本及近

刻並訛春秋文公十有一年案一近刻左丘明云襄

公二年王子成父獲長狄僑如弟榮如埋其首于周

首之北門即是邑也今世謂之盧子城濟北郡治也

京相璠曰今濟北所治盧子城故齊周首邑也

又北過臨邑縣東

地理志曰縣有濟水祠王莽之穀城亭也水有石門以石為之故濟水之門也春秋隱公五年齊鄭會于石門鄭車僨濟即于此也京相璠曰石門齊地今濟北盧縣故城西南六十里有故石門去水三百步蓋水瀆流移故側岸也濟水又北逕平陰城西案此九字原本及近刻並訛作經春秋襄公十八年晉侯沈玉濟河會于魯濟尋淇梁之盟同伐齊齊侯禦諸平陰者也杜預曰城在盧縣故城東北非也京相璠曰平陰齊地也在

濟北盧縣故城西南十里平陰城南有長城東至海西至濟河道所由名防門去平陰三里齊侯塹防門即此也其水引濟故瀆尚存今防門北有光里齊人言廣音與光同即春秋所謂守之廣里者也又云巫山在平陰東北昔齊侯登望晉軍畏衆而歸師曠邢伯聞烏烏之聲知齊師潛遁人物咸淪地理昭著賢于杜氏東北之證矣今巫山之上石室世謂之孝子堂濟水右迤過為湄湖案過近刻方四十餘里濟水又東北逕垣苗城西案此十字原本及近刻並訛作經故洛當城



也伏鞫北征記曰濟水又與清河合流至洛當者也

宋武帝西征長安令垣苗鎮此案垣苗近刻訛作桓遵故俗又

有垣苗城之稱案近刻訛作故俗人有桓苗之稱河水自四瀆口東

北流而為濟案四原本及近刻並訛作泗今改正四瀆口見卷五河水內又濟近刻訛作蒲

魏土地記曰盟津河別流十里與清水合亂流而東

逕洛當城北黑白異流涇渭殊別而東南流注也

又東北過盧縣北

濟水東北與涓溝合水上承涓湖北流注濟爾雅曰

水草交曰涓通谷者微犍為舍人曰水中有草木交

合也郭景純曰微水邊通谷也釋名曰涓眉也臨水

如眉臨目也濟水又逕盧縣故城北案此九字原本及近刻並訛作

經濟北郡治也漢和帝永元二年分泰山置蓋以濟

水在北故也濟水又逕什城北城際水涓故邸閣也

祝阿人孫什將家居之以避時難因謂之什城焉濟

水又東北與中川水合案此十字原本及近刻並訛作經水東南出

山在縣之分水嶺溪一源兩分泉流半解亦謂之分

流交半水南出太山入汶半水出山在縣西北流逕

東太原郡南案東字近刻訛在逕字上考東太原係劉宋僑置郡治山爐固

案山爐地名改案近刻訛作與北與賓溪水合漢賓谷水合水出

南格馬山賓溪谷案近刻賓上行漢字又脫各字北逕盧縣故城北

陳敦成南西北流與中川水合謂之格馬口其水又

北逕盧縣故城東而北流入濟俗謂之為沙溝水濟

水又東北右會玉水案此九字原本及近刻並訛作經水導源太山

朗公谷案近刻重一谷字舊名琨瑞溪有沙門竺僧朗少事

佛圖澄碩學淵通尤明氣緯隱于此谷因謂之朗公

谷故車頰秦書云苻堅時沙門竺僧朗嘗從隱士張

巨和遊巨和常穴居而朗居琨瑞山大起殿舍連樓

累閣案累近刻訛作疊雖素飾不同竝以靜外致稱卽此谷

也水亦謂之琨瑞水也其水西北流逕玉符山又曰

玉水又西北逕獵山東又西北枕祝阿縣故城東野

井亭西春秋昭公二十五年經書齊侯唁公于野井

是也春秋襄公十九年諸侯盟于祝柯案近刻訛作阿左傳

所謂督陽者也漢興改之曰阿矣漢高帝十一年封

高邑為侯國王莽之安成者也故俗謂是水為祝阿

澗水北流注于濟建武五年耿弇東擊張步從朝陽

橋濟渡兵卽是處也濟水又東北灤水入焉案此九字原本

及近刻竝訛作經入訛作出水出歷城縣故城西南案歷城近泉刻脫城字

源上奮水涌若輪春秋桓公十八年公會齊侯于灤

是也俗謂之為娥姜水以泉源有舜妃娥英廟故也

城南對山山上有舜祠山下有大穴謂之舜井抑亦

茅山禹井之比矣書舜耕歷山亦云在此所未詳也

其水北為大明湖西即大明寺寺東北兩面側湖此

水便成淨池也池上有客亭左右楸桐負日俯仰目

對魚鳥案此下近刻衍極字水木明瑟可謂濠梁之性物我無

違矣湖水引瀆東入西郭東至歷城西而側城北注

陂水上承東城歷祀下泉案陂近刻作湖泉源競發案近刻脫泉字

其水北流逕歷城東又北引水為流杯池州僚賓燕

公私多萃其上分為二水右水北出左水西逕歷城

北西北為陂謂之歷水與灤水會又北歷水枝津案此

六字近刻訛作首受歷水于歷城東東北逕東城西

而北出郭又北注灤水又北聽水出焉灤水又北流

注于濟謂之灤口也濟水又東北案此句之下朱謀

華不注山乃華水之源非濟水所逕箋說華不注山

非也又此五字原本及近刻竝訛作經單椒秀澤不連丘陵以自高虎牙

案此四字原本及近刻亦竝訛作經

力經注 卷八  
築立孤峯特拔以刺天青崖翠發望同點黛山下有  
華泉故京相璠春秋土地名曰案曰字近刻訛在春  
字上名下復衍也字  
華泉華不注山下泉水也春秋左傳成公二年齊頃  
公與晉卻克戰于鞏齊師敗績逐之三周華不注逢  
丑父與公易位將及華泉驂絙于木而止丑父使公  
下如華泉取飲齊侯以免韓厥獻丑父卻子將戮之  
呼曰自今無有代其君任患者有一于此將為戮矣  
卻子曰人不難以死免其君我戮之不祥赦之以勸  
事君者乃免之即華水也北絕聽瀆二十里注于濟

又東北過臺縣北

巨合水南出雞山西北北逕巨合故城西耿弇之討  
張步也守巨里即此城也三面有城西有深坑坑西  
即弇所營也與費邑戰斬邑于此巨合水又北合關  
盧水案此下近刻  
衍關盧二字水導源馬耳山北逕博亭城西西  
北流至平陵城案陵近刻  
訛作陸與武原水合水出譚城南  
平澤中世謂之武原淵案近刻  
訛作泉北逕譚城東俗謂之  
布城也案布近刻  
訛作有又北逕東平陵縣故城西故陵城  
也後乃加平譚國也齊桓之出過譚譚不禮焉魯莊

公九年即位又不朝十年滅之城東門外有樂安任

照先碑濟南郡治也案近刻脫郡字漢文帝十六年置為王

國景帝二年為郡王莽更名樂安案此下近刻衍郡字其水又

北逕巨合城東漢武帝以封城陽頃王子劉發為侯

國案發下近刻衍于字其水合關盧水西出注巨合水案西近刻訛作

而巨合水西北逕臺縣故城南漢高帝六年封東郡

尉戴野為侯國王莽之臺治也其水西北流白野泉

水注之水出臺城西南白野泉北逕雷山西北流而

右注巨合水巨合水又北聽水注之水上承灤水東

流北屈又東北流注于巨合水亂流又北入于濟濟

水又東北合芹溝水案此九字原本及近刻並訛作經水出臺縣故

城東南西北流逕臺城東又西北入于濟水

又東北過營縣南

濟水東逕縣故城南漢文帝四年案近刻訛作景帝二年封齊

悼惠王子罷軍為侯國右納百脈水案此下近刻衍百脈二字水

出土鼓縣故城西案鼓原本及近刻俱訛作穀今據漢書改正水源方百

步百泉俱出故謂之百脈水其水西北流逕陽丘縣

故城中案陽近刻訛作楊下同漢孝文帝四年案文帝近刻訛作景帝以

封齊悼惠王子劉安為陽丘侯世謂之章丘城非也

城南有女郎山山上有神祠俗謂之女郎祠左右民

祀焉其水西北出城北逕黃巾固蓋賊所屯故固得

名焉百脈水又東北流注于濟濟水又東案近刻訛作東又

有楊渚溝水出逢陵故城西南二十里案出逢陵近刻訛作逕於

陵又脫二字西北逕土鼓城東又西北逕章丘城東又

北逕甯戚城西案近刻脫戚城二字而北流注于濟水也

又東過梁鄒縣北隴水南出長城中北流至般陽縣故城西南與般水

會水出縣東南龍山俗亦謂之為左阜水西北逕其

城南王莽之濟南亭也應劭曰縣在般水之陽故資

名焉案故近刻訛作縣其水又南屈西入隴水隴水北逕其

縣西北流至萌水口案此下近刻衍萌字水出西南甲山東北

逕萌山西東北入于隴水隴水又西北至梁鄒東南

與魚子溝水合水南出長白山東柳泉口案柳近刻訛作柳

山即陳仲子夫妻之所隱也孟子曰仲子齊國之世

家兄戴祿萬鍾仲子非而不食避兄離母家于於陵

即此處也其水又逕於陵縣故城西王莽之於陸也

世祖建武十五年更封則鄉侯侯霸之子昱為侯國

案近刻脫之子昱三字其水北流注于隴水隴水即古袁水也

故京相璠曰濟南梁鄒縣有袁水者也隴水又西北

逕梁鄒縣故城南又北屈逕其城西漢高祖六年封

武虎為侯國其水北注濟城之東北又有時水西北

注焉

又東北過臨濟縣南

縣故狄邑也王莽更名利居漢記安帝永初二年改

從今名以臨濟故地理風俗記云案此下近刻衍有字樂安太

守治晏謨齊記曰有南北二城隔濟水南城即被陽

縣之故城也北枕濟水地理志曰侯國也如淳曰一

作疲音罷軍之罷也史記建元以來王子侯者年表

曰漢武帝元朔四年封齊孝王子敬侯劉燕之國也

今渤海僑郡治濟水又東北迤為淵渚謂之平州案此

十三字原本及近刻並訛作經潔沃縣側有平安故城案縣字近刻訛在安字下

俗謂之會城非也案地理志千乘郡有平安縣侯國

也王莽曰鴻睦也應劭曰博昌縣西南三十里有平

安亭故縣也世尚存平州之名矣濟水又東北逕高

昌縣故城西案地理志千乘郡有高昌縣漢宣帝地

節四年封董忠為侯國世謂之馬昌城非也案非近刻訛作

此濟水又東北逕樂安縣故城南案此十二字原本及近刻並訛作經

伏琛齊記曰博昌城西北五十里有南北二城相去

三十里隔時濟二水指此為博昌北城非也樂安與

博昌薄姑分水俱同西北薄姑去齊城六十里樂安

越水差遠驗非尤明班固曰千乘郡有樂安縣應劭

曰取休令之名矣漢武帝元朔五年封李蔡為侯國

城西三里有任光等冢光是宛縣人案近刻不得為脫宛字

博昌明矣濟水又經薄姑城北後漢郡國志曰博昌

縣有薄姑城地理書曰呂尚封于齊郡薄姑薄姑故

城在臨淄縣西北五十里近濟水史遷曰獻公徙薄

姑案獻公近刻訛作胡公城內有高臺春秋昭公二十年齊景

公飲于臺上曰古而不死何樂如之晏平仲對曰昔

爽鳩氏始居之季荊因之有逢伯陵又因之薄姑氏

又因之而後太公因之臣以為古若不死爽鳩氏之

樂非君之樂即于是臺也濟水又東北逕狼牙固西

而東北流也



又東北過利縣西

地理志齊郡有利縣王莽之利治也晏謨曰縣在齊

城北五十里也

案齊近刻訛作濟又脫也字

又東北過甲下邑入于河

濟水東北至甲下邑南東歷琅槐縣故城北地理風

俗記曰博昌東北八十里有琅槐鄉故縣也山海經

曰濟水絕鉅野注渤海入齊琅槐東北者也

案齊原本及近

刻竝訛作濟今改正

又東北河水枝津注之水經以為入河非

也斯乃河水注濟非濟入河又東北入海

案此五字原本及近

刻竝訛作經今考經言濟水入河其文已終觀此郭下仍辯經濟水入河之非可證五字屬注文甚明

景純曰濟自滎陽至樂安博昌入海今河竭濟水仍

流不絕經言入河二說竝失然河水于濟漯之北別

流注海今所輟流者惟漯水耳郭或以為濟注之即

實非也

案即近刻訛作事

尋經脈水不如山經之為密矣

其一水東南流者過乘氏縣南

案近刻脫南字

荷水分濟于定陶東北

案荷近刻訛作河下同

東南右合黃溝

枝流俗謂之界溝也北逕已氏縣故城西

案已近刻訛作元

又北逕景山東衛詩所謂景山與京者也毛公曰景

山大山也又北逕楚丘城西郡國志曰成武縣有楚丘亭杜預云楚丘在成武縣西南衛懿公為狄所滅衛文公東徙渡河野處曹邑齊桓公城楚丘以遷之故春秋稱邢遷如歸衛國忘亡即詩所謂升彼虛矣以望楚矣望楚與堂景山與京故鄭玄言觀其有邑及山川也又東北逕成武城西又東北逕郟城東疑郟徙也所未詳矣又東北逕梁丘城西案丘近刻地訛作山地理志曰昌邑縣有梁丘鄉春秋莊公三十二年宋人齊人會于梁丘者也杜預曰高平昌邑縣西南有梁

丘鄉又東北于乘氏縣西而北注河水河水又東南

逕乘氏縣故城南縣即春秋之乘丘也故地理風俗

記曰濟陰乘氏縣故宋乘丘邑也漢孝景中五年

案下近刻中封梁孝王子買為侯國也地理志曰乘氏縣

泗水東南至睢陵入淮郡國志曰乘氏有泗水此乃

荷澤也案荷澤近刻訛作河濟下同尚書有導荷澤之說自陶丘

北東至于荷無泗水之文又曰導荷澤被孟豬孟豬

在睢陽縣之東北闕駟十三州記曰不言入而言被

者明不常入也水盛方乃覆被矣澤水淼漫俱鍾淮

泗案淮近刻訛作睢

故志有睢陵入淮之言以通苞泗名矣

然諸水注泗者多不止此可以終歸泗水便得擅通稱也或更有泗水亦可是水之兼其目所未詳也

又東過昌邑縣北

河水又東逕昌邑縣故城北地理志曰縣故梁也漢

景帝中六年

案中下近刻衍元字

分梁為山陽國

案此下近刻衍漢字

帝天漢四年更為昌邑國以封昌邑王

案近刻訛作賀

廢國除以為山陽郡王莽之鉅野郡也後更為高平

郡後漢沈州治

案近刻脫治字

縣令王密懷金謁東萊太守

楊震震不受是其慎四知處也大城東北有金城城

內有沈州刺史河東薛季像碑

案季近刻訛作棠

以郎中拜

刻令甘露降園熹平四年遷州明年甘露復降殿前

樹從事馮巡主簿華操等相與褒樹表勒棠政次西

有沈州刺史茂陵楊叔恭碑

案陵近刻訛作陽

從事孫光等

以建寧四年立西北有東太山成人班孟堅碑建和

十年尚書右丞拜沈州刺史從事秦閏等

案閏近刻訛作闕

刊石頌德政碑咸列焉

又東過金鄉縣南

水經注 卷八  
郡國志曰山陽有金鄉縣河水逕其故城南世謂之  
故縣城北有金鄉山也

又東過東緡縣北

河水又東逕漢平狄將軍扶溝侯淮陽朱鮪冢案此

字原本及近刻並訛作經荷訛作濟墓北有石廟河水又東逕東緡縣

故城北故宋地春秋僖公二十三年齊侯伐宋圍緡  
十三州記曰山陽有東緡縣鄒衍曰余登緡城以望  
宋都者也後漢世祖建武十一年封馮異長子璋為  
侯國

又東過方與縣北為河水

河水東逕重鄉城南案此八字原本及近刻並訛作經又荷訛作濟左傳所

謂臧文仲宿于重館者也河水又東逕武棠亭北公

羊以為濟上邑也城有臺高二丈許案臺字近刻其訛在高字下

下臨水昔魯侯觀魚于棠謂此也在方與縣故城北

十里經所謂河水也河水又東逕泥母亭北春秋左

傳僖公七年秋盟于甯母謀伐鄭也河水又東與鉅

野黃水合河澤別名也案澤近刻訛作濟黃水上承鉅澤諸

陂澤有濛淀盲陂案盲近刻訛作育黃湖水東流謂之黃水

又有薛訓渚水自渚歷薛村前分爲二流一水東注

黃水一水西北入澤卽洪水也黃水東南流水南有

漢荊州刺史李剛墓剛字叔毅山陽高平人案平近刻訛作

車熹平元年卒見其碑有石闕祠堂石室三閒椽架

高丈餘鏤石作椽瓦屋施平天造方井側荷梁柱案荷

近刻訛作荷四壁隱起彫刻爲君臣官屬龜龍麟鳳之文

飛禽走獸之像作制工麗不甚傷毀黃水又東逕鉅

野縣北何承天曰鉅野湖澤廣大南通洙泗北連清

濟舊縣故城正在澤中故欲置戍于此城城之所在

則鉅野澤也衍東西出爲大野矣昔西狩獲麟于是

處也皇覽曰山陽鉅野縣案野近刻訛作澤有肩髀冢重聚

大小與闕冢等傳言蚩尤與黃帝戰克之于涿鹿之

野身體異處故別葬焉黃水又東逕咸亭北春秋桓

公七年經書焚咸丘者也水南有金鄉山案近刻訛作縣

之東界也金鄉數山皆空中穴口謂之隧也戴延之

西征記曰焦氏山北數里案里近刻訛作山下復衍有字漢司隸校

尉魯峻案近刻訛作恭穿山得白蛇白兔不葬更葬山南鑿

而得金故曰金鄉山山形峻峭冢前有石祠石廟四

乃經注 卷八  
壁皆青石隱起自書契以來忠臣孝子貞婦孔子及  
弟子七十二人形像像邊皆刻石記之文字分明又  
有石牀長八尺磨瑩鮮明叩之聲聞遠近時太尉從  
事中郎傅珍之諮議參軍周安穆拆敗石牀各取去  
爲魯氏之後所訟二人竝免官焦氏山東卽金鄉山  
也有冢謂之秦王陵山上二百步得冢口塹深十丈  
兩壁峻峭廣二丈入行七十步得埏門門外左右皆  
有空可容五六十人謂之白馬空埏門內二丈得外  
堂外堂之後又得內堂觀者皆執燭而行雖無他雕

鏤然治石甚精或云是漢昌邑哀王冢所未詳也東

南有范巨卿冢名件猶存

案名件近刻作石柱

巨卿名式山陽

之金鄉人漢荊州刺史與汝南張劭長沙陳平子石  
交號爲死友矣黃水又東南逕任城郡之亢父縣故  
城西夏后氏之任國也漢章帝元和元年別爲任城  
在北王莽之延就亭也縣有詩亭春秋之詩國也王  
莽更之曰順父矣地理志東平屬縣也世祖建武二  
年封劉隆爲侯國其水謂之桓公溝案水近刻訛作中南至  
方與縣入于菏水菏水又東逕秦梁夾岸積石一里

高二丈言秦始皇東巡所造因以名焉

荷水又東過湖陸縣南東入于泗水

澤水所鍾也尚書曰浮于淮泗達于荷是也

案說文荷字下

亦引禹貢浮于淮泗達于荷

東觀漢記曰蘇茂殺淮陽太守得其

郡營廣樂大司馬吳漢圍茂茂將其精兵突至湖陵

案近刻訛作陸與劉永相會濟陰山陽濟兵于此處也

又東南過沛縣東北

濟與泗亂故濟納互稱矣

案近刻濟訛作沛互訛作于

東觀漢記

安平侯蓋延傳曰延為虎牙大將軍與永等戰永軍

反走

案近刻訛作與戰水軍反走

溺水者半復與戰

案復近刻訛作後連

破之遂平沛楚臨淮悉降延令沛脩高祖廟置齋夫

祝宰樂人因齋戒祠高廟也

又東南過留縣北

留縣故城翼佩泗濟宋邑也春秋左傳所謂侵宋呂

留也故繁休伯避地賦曰朝余發乎泗洲夕余宿于

留鄉者也張良委身漢祖始自此矣終亦取封焉城

內有張良廟也

又東過彭城縣北獲水從西來注之

案獲原本訛作獲近刻遂訛作睢注

水經注

卷八 濟水

三

水經注 卷之二十三  
同今改正獲水  
見卷之二十三

濟水又南逕彭城縣故城東北隅不東過也獲水自

西注之城北枕水滑濟水又南逕彭城縣故城東

十一字原本及近刻並訛作經不逕其北也案其下近刻衍縣字蓋經誤證

又東南過徐縣北

地理志曰臨淮郡漢武帝元狩五年置治徐縣王莽

更之曰淮平縣曰徐調故徐國也案近刻脫故徐二字春秋昭

公三十年吳子執鍾吾子遂伐徐防山以水之遂滅

徐徐子奔楚楚救徐弗及遂城夷以處之張華博物

志錄著作令史茅溫所為送案此三字當有脫誤未詳劉成國徐

州地理志云徐偃王之異言徐君宮人娠而生卵以

為不祥棄之于水濱孤獨母有犬名曰鵠倉獵于水

側得棄卵銜以來歸孤獨母以為異案近刻脫孤字覆煖之

遂成兒生時偃故以為名徐君宮中間之乃更錄取

長而仁智襲君徐國後鵠倉臨死生角而九尾寔黃

龍也偃王葬之徐中案葬近刻訛作昔今見有狗壟焉偃王

治國仁義著聞欲舟行上國乃通溝陳蔡之間案通近刻

訛作得朱弓矢以得天瑞遂因名為號自稱徐偃王



江淮諸侯服從者三十六國周王聞之遣使至楚令  
 伐之偃王愛民不鬪遂為楚敗北走彭城武原縣東  
 山下百姓隨者萬數因名其山為徐山山上立石室  
 廟有神靈民人請禱焉依文即事似有符驗但世代  
 繇遠難以詳矣今徐城外有徐君墓昔延陵季子解  
 劍于此所謂不違心許也

又東至下邳睢陵縣南入于淮

濟水與泗水渾濤東南流

案渾濤近刻訛作澤洶

至角城同入

淮經書睢陵誤耳

水經注卷八

水經注

卷八 濟水

三





